




Պ Ա Տ Մ Ա — Բ Ա Ն Ա Ս Ի Ր Ա Կ Ա Ն

ՎԱՂԱՐՇԱՊԱՏԻ ՄԱՇՏՈՅԸ

Ցավ ի սրտի պետք է ասել, որ Ե—ԺԵ դդ. կեսերը Վաղարշապատում ընդօրինակված ոչ մի ձեռագիր չի պահպանվել: Բացառված չէ, սակայն, որ մի քանի բեկորներ պատառիկների կամ պատառիկ-պահպանակների տեսքով, պահպանված լինեն, բայց նրանք դեռ երկար կլռեն: Հայտնի է նաև, որ մինչև Թ դարը թվակիր ոչ մի հայերեն ձեռագիր չի հասել մեր օրերը, իսկ հատկապես Ե դարում գրիչները հիշատակարան գրելու սովորություն չեն ունեցել:

1441 թվականին Կաթողիկոսական Աթոռի Էջմիածնում վերահաստատվելու մասին Ստեփանոս Մալխասյանցը գրում է. «Այս փոխադրությունը, սակայն, նման չէր նախկին փոփոխություններին, որոնք տեղի էին ունենում քաղաքական հանգամանքների դրդմամբ՝ գտնվելու այնպիսի տեղերում, որտեղ կենտրոնացած էին հայկական իշխանությունները կամ ապահով էին ելուզակների ապաստանություններից. այնինչ այս վերջին փոխադրությունը Էջմիածին՝ բխում էր ուղղակի կրոնական-եկեղեցական պահանջից՝ ապահովելու համայն Հայոց կաթողիկոսների անկախությունը պապերից, Հայոց Հայրապետության ինքնագլխությունն ու ինքնուրույնությունը, Հայոց դավանության և ծեսերի անխախտությունը օտար Եկեղեցիների ունահարություններից: Հայրապետական Աթոռի այս վերջին փոխադրությունը միակ միջոցը հանդիսացավ նրան և՛ փրկելու, և՛ նրա հարատև գոյությունը պահպանելու»¹:

Հինգ ու կես հարյուրամյա վաղեմություն ունեցող այս իրադարձությունը հիրավի բախտորոշ էր մեր ժողովրդի հետագա նակատագրի համար, որովհետև, զրկված լինելով պետականությունից և գտնվելով օտար, այ-

¹ Մալխասյանց Ստեփան, Հավերժացման արժանի հոբելյան (Հայոց Հայրապետական Աթոռի Սսից Էջմիածին վերահաստատվելու 500-ամյակը նշելու մասին), «Էջմիածին», 1945, Մայիս, էջ 43—45:

լակրոն բռնապետությունների տիրապետության ներքո, աշխարհասփյուռ հայությունը մեկընդմիջտ կապվեց հայրենի բնաշխարհին, համախմբվեց հոգևոր-եկեղեցական առանցքի շուրջ՝ միասնական կենտրոն ունենալով Ս. Էջմիածինը, պահպանեց նախնյաց ավանդներն ու մշակութային ինքնությունությունը:

Կիրակոս Վիրապեցու ձեռնադրությունից հետո, նրա ջերմ պաշտպան Թովմա Մեծոփեցի բաբունապետն իր աշակերտների հետ միասին հաստատվում է Էջմիածնում: Մեծոփեցին այստեղ շարունակում է ուսումնակրթական գործունեությունը, ուստի և հանդիսանում է Վաղարշապատի նոր դպրոցի հիմնադիրը: Այս գործում նրա աջակիցներից հայտնի են այդ ժամանակ Էջմիածնում գտնվող Կիրակոս Ռշտունեցին և Սարգիս բաբունապետը²:

Ալպոյաճյանն իր հերթին նկատում է. «Էջմիածին, երբ 1441-ին վերըստին դարձավ Ամենայն Հայոց Կաթողիկոսական Աթոռ, Կիրակոս Վիրապեցիի կաթողիկոս ընտրությամբ, Թովմա Մեծոփեցի հոգն հաստատվեցավ և ուսուցանել սկսավ հավաքված աշակերտության»³:

Ամենայն Հայոց Կաթողիկոսական Սուրբ Աթոռի վերահաստատումով, Էջմիածինը դառնում է նաև ուխտատեղի գրչության արվեստով զբաղվող անձանց համար: Այսպես, օրինակ, գրիչ Հակոբ վարդապետը մի ձեռագիր է սկսում գրել Արգելանի Տեր Հուսկան Որդի վանքում, այնուհետև շարունակում Կողբի վանքում, «...որ այժմ ասի Լուսաւորչի վանք եւ Սուրբիսեանք», որից հետո «սակաւ մի ի յԷջմիածինն՝ ի ժամանակս Կիրակոս կաթողիկոսին», նշում է գրիչը և ուխտագնացությունը ավարտում «ի յԱրտազգաւտիս, ի գիւղս, որ կոչի Մակու, ի վանքս, որ կոչի Սուրբ Աստուածածնի»⁴:

Այստեղ նույն՝ 1441 թվականին Թովմա Մեծոփեցի բաբունապետը սկիզբ է դնում իր «Յիշատակարան»-ին, որն իր բնույթով միակ խոշոր ծավալի սկզբնաղբյուրն է Կաթողիկոսական Աթոռը Սսից Էջմիածին տեղափոխելու մասին⁵:

Ակնհայտ է նաև, որ Կիրակոս Ռշտունեցին իր ժամանակագրությունը կազմել է Էջմիածնում, որտեղից ստիպված է եղել հեռանալ 1443 թվականին⁶:

Գրիգոր գրիչը 1450 թվականին այստեղ սկսում է ընդօրինակել մի «Մաշոց», սակայն սկսված համաճարակը ստիպում է ձերունի Գրիգորին տեղից-տեղ անցնելով ձեռագիրն ավարտել Բյուրականում: Զեռագրի հիշատակարանում Գրիգորը նշում է իր ուսուցիչներին՝ «...բազմերախտ վար-

² Կարեն Ա. Մաթևոսյան, Հայոց պատմության բախտորոշ 1441 թվականը, «Էջմիածին», 1991 թ., Հուլիս-Օգոստոս, էջ 13:

³ Արշատ Ալպոյաճյան, Պատմություն հայ դպրոցին, հ. Ա, Կահիրե, 1958, էջ 347: Տես նաև Վահան Եպս. Տերյան (փոխանորդ Արարատյան թեմի), Ս. Էջմիածնի դպրոցը 15—17-րդ դարերում, «Էջմիածին», 1968 թ., Բ, էջ 33:

⁴ Մայր ցուցակ ձեռագրաց Սրբոց Յակոբեանց, հատոր հինգերորդ, կազմեց Նորայր Եպս. Պողարեան, Երուսաղեմ, 1971, էջ 429 (այսուհետև Ցուցակ Երուսաղեմի): Տես նաև ԺԵ դարի հայերեն ձեռագրերի հիշատակարաններ, մասն երկրորդ (1451—1480 թթ.), կազմեց Լ. Ս. Խաչիկյան, Երևան, 1958, էջ 54: Նաև նույնի՝ մասն երրորդ (1481—1500 թթ.), Երևան, 1967, էջ 415—416 (Այսուհետև՝ ԺԵ դարի հիշատակարաններ):

⁵ Թովմա Մեծոփեցու Հիշատակարանը, հրատ.՝ Կ. Կոստանյանց, Թիֆլիզ, 1892:

⁶ Վ. Հակոբյան, Մանր ժամանակագրություններ, հ. Ա, Երևան, 1951, էջ 113—124:

պետին՝ Երեմիայի» և Չորիկ մականունով Հովհաննես արեղային⁷, որոնց պետք է, որ աշակերտած լինեն Էջմիածնում⁸: Այս ձեռագրի ստացողն ու նվիրատուն Սևանի վարդապետարանի հիմնադիր Դանիել վարդապետն է, որն իր ուսումը շարունակել է Էջմիածնի դպրատանը, Երեմիա վարդապետի մոտ, երբ դեռ արեղա էր⁹: Ուսանելու ընթացքում է, որ իր ծնողների միջոցով պատվիրում է Գրիգոր արեղային վերոհիշյալ «Ճաշոցը»: Ա. Ղազարոսյանի նկատումներով Գրիգորը և Դանիելը ազգակցական կապեր ունեն¹⁰:

Սակայն մեզ հասած առաջին ամբողջական ձեռագիրը, որը սկսվել և ավարտվել է Էջմիածնում, «Մաշտոց ձեռնադրութեան» ծիսարանն է, որը գրվել է 1461 թվականին Ստեփանոս կրոնավորի կողմից: Ստացողն է՝ Զաքարիա Աղթամարցի Կաթողիկոսը:

Մաշտոցի անվան Մատենադարանի № 4997 համարանիշը կրող այս ձեռագրի ամբողջական խորագիրն է՝ «Մաշտոց օրհնութեան սրբալոյս միւռոնի, եպիսկոպոսի եւ կաթողիկոսի ձեռնադրութեան եւ օծման թագաւորի»:

Դարերի հոլովույթով անցած և մեր օրերը հասած ամեն մի ձեռագիր ոչ միայն անցյալի և իր ժամանակի մտածողությունն ու պատմությունն ամբարող հուշարձան է, այլ նաև իր սպրած տարիների, անցած յուրատեսակ ճանապարհի կենդանի վկան:

Տվյալ ձեռագիր հուշարձանի ուսումնասիրության հիմնական աղբյուրն ինքը ձեռագիրն է՝ ձևով, գրանյութով, գրով, բովանդակությամբ, մանրանկարչությամբ, կազմով ու հիշատակարաններով:

Մատենադարանի № 4997 համարանիշը կրող ձեռագիրը բաղկացած է 18×24 սմ մեծության մագաթաղյա լավ մշակված թերթերից:

Նկարագարդ այս ձեռագիրը կազմված է չորս մասից.

ա. 3ա—50ա (Եպիսկոպոսարհներ)

բ. 51ա—74բ Կանովն յորժամ կաթողիկոս ձեռնադրեն ամենայն Հայոց

գ. 75ա—111բ (Մեռոնարհներ)

դ. 112ա—32բ Կանովն եւ կարգաւորութիւն արհնութեան թագաւորի ըստ մեծի եկեղեցւոյն¹¹:

Հետաքրքրական է մի հանգամանք:

ԺԵ դարի կեսերին լայն շրջանառության մեջ էր դրված թուղթը, որպես ձեռագիր կազմելու հիմնական նյութ, այնուամենայնիվ ինչ նպատակ է հետապնդում ստացողը, երբ սույն Մաշտոցը պատվիրում է գաղափարել և յուրատեսակ ճերմակությամբ, լավ մշակված մագաղաթի վրա: Այստեղ առատորեն օգտագործված է ոսկին, ոչ միայն մանրանկարներում (թվով 5-ը),

⁷ ԺԵ դարի հիշատակարաններ, մասն Գ, Երևան, 1967, էջ 412—413:

⁸ Կարեն Մաթևոսյան, նշված աշխ., էջ 13:

⁹ Ցուցակ Երուսաղեմի, հ. 9, Երուսաղեմ, 1979, էջ 544:

¹⁰ Ա. Հ. Ղազարոսյան, Դանիել բարունապետը և Սևանի դպրոցը, «Պատմա-հանրահայրական հանդես», 1986, № 3, էջ 99—107:

¹¹ 1311 թվականին գրված «Սույ Մայր Մաշտոց»-ում այս կանոնը խորագրված է հետևյալ կերպ. «Կարգաւորութիւն արհնութեան թագաւորի ըստ մեծի եկեղեցւոյն Հռոմայ»: Կաթողիկոսական Աթոռի փոխադրությունից հետո այլևս ավելորդ էր նշել «Հռոմայ» արտահայտությունը: Տես, Մայր ցուցակ հայերեն ձեռագրաց Մեծի Տանն Կիլիկիոյ Կաթողիկոսութեան, կազմեց Անուշաւան վարդապետ Դանիէլեան, Անթիլիաս-Լիբանան, 1984, էջ 97:

այլև լուսանցազարդերում, խորաններում ու տեքստերում անգամ՝ առավել ուժգին դարձնելու այս կամ այն միտքը:

Մանրանկարների և գրության միօրինակության պահպանումը, կատարված փայլուն վարպետությամբ, վկայում է այն մասին, որ գրիչն ու ծաղկողը նույն անձնավորությունն է՝ Ստեփանոս կրոնավորը:

Գրիչը, բացառությամբ 2բ էջի «Աստուածածին Մայր Աստուծոյ» մանրանկարից, մնացյալ չորսում պատկերում է ԺԵ դարում գործող պատմական անձանց: Իր ժամանակակիցներին մանրանկարիչը ներկայացնում է իրենց ծիսական զգեստներով, դիմագծերով, տվյալ ծեսին համապատասխան դիրքերով և շարժումներով:

Լ. Խաչիկյանը, վերատպելով այս ձեռագրի 11բ էջի «Եպիսկոպոսարհներ» պատկերող մանրանկարը, տողատակում նշում է. «Կաթողիկոսական համագգեստ հագած արարողապետը՝ հավանաբար Զաքարիա Կաթողիկոսն է»¹²: Անվանի գիտնականի եզրակացությունը ճշտվեց կատարված ուսումնասիրությունների միջոցով, որոնց մասին կխոսվի ստորև:

Մի ձեռքում բռնած ծիսագիրքը, իսկ մյուսը՝ օրհնության դիրքով եպիսկոպոսի գլխին հպած եպիսկոպոսապետը, լայնադեմ է, ներմականեր, զուսպ փակված շուրթերը վկայում են նրա մեծ կամքի մասին: Նա կրում է եռագագաթ մի թագ, պատված թանկարժեք քարերով: Գրիչն առավել կարևորելու համար կաթողիկոսի անձը, ծեսին մասնակցող մնացյալ անձանց համեմատությամբ նրան պատկերում է առավել խոշորամարմին ու բարձրահասակ:

Գլխավոր հիշատակարանում այսպես է ներկայացնում Զաքարիա Կաթողիկոսին Ստեփանոս գրիչը. «Այլեւ այսուամենայնիւ լցեալ զառ ի յԱստուծոյ պատուեալ երջանիկս արիացեալ Հայր զարհնութեամբ, հովանաւորեալ բնութեամբ Որդոյն, յարդեալ Հոգւոյն Սրբոյ, շնորհօք զարդարեալ ի հոգի, ի մարմին եւ ի միտս, նաեւ ի բարի յարմատոց շառաւիղ ընդդեալ շնարհաւքն Քրիստոսի, յազգէ թագաւորին Գագկայ Հայոց մեծաց՝ Տէր Զաքարիայ Կաթողիկոս եւ պատրիարք Վաղարշապատու մեծի քաղաքի...»¹³:

Գրիչը «Տէր Զաքարիայ» արտահայտությունը նշանագրում է ոսկեգրով, իսկ «Կաթողիկոս եւ պատրիարք Վաղարշապատու մեծ քաղաքի» հատվածը՝ կարմրագրով, որն ինքնին ընդգծում է յուրահատուկ վերաբերմունք:

Ծարունակելով, Ստեփանոսը տեղեկացնում է, որ Զաքարիան, Աղթամարից գալով Էջմիածին, «կարողութեամբ Սուրբ Հոգւոյն եւ ողորմութեամբ ըն Քրիստոսի եւ միջնորդութեամբ Սուրբ Աստուածածնին եւ աղաթիւք սուրբ Լուսաւորչին Գրիգորի՝ տիրեաց Սուրբ Էջմիածինս եւ աստուածադիր Սուրբ Աթոռոյս Վաղարշապատու եւ ամենայն հայկազեան սեռի»¹⁴:

Հայտնի է, որ, իրոք, Զաքարիա Կաթողիկոսը ոչ թե ընտրվեց և օծվեց Ամենայն Հայոց Կաթողիկոս, քանզի Էջմիածնում այդ ժամանակահատվածում կաթողիկոս էր Գրիգոր Զալալբեկյանցը, այլ Զհանշահ «փառշահի» միջնորդությամբ «տիրեաց» Հայրապետական Աթոռին:

Այս իրողությունն են փաստում նաև այլ ձեռագրական տվյալներ: 1460 թվականին Ստեփանոս գրիչը, որը ստացողն է մի Ավետարանի, գրում է. «Եւ ես՝ Ստեփանոս ետու զսուրբ Աւետարանս Հաւատարորի վանաց, դրան

¹² ԺԵ դարի յիշատակարաններ, մասն Բ, էջ 155: Մաշտոցի անվան Մատենադարան, ձեռ. № 4997, էջ 11բ (այսուհետև Մ. Մ.):

¹³ ՄՄ. ձեռ. № 4997, էջ 135ա:

¹⁴ Նույն տեղում, էջ 135բ:

Սուրբ Գեորգեա Զաքարիան, ի հայրապետության տեառն Զաքարիայի, որ յայս ամի տիրեաց Էջմիածնին եւ Լուսաւորչի Սուրբ Աջոյն»¹⁵:

Նույն թվականին Աղթամարում Հակոբ գրիչը գաղափարում է մեկ այլ Ավետարան. «...ի հայրապետության տեառն Զաքարիայի, որ տիրեաց Էջմիածնի Սուրբ Աթոռոյն եւ Սուրբ Աջոյն Լուսաւորչին, եւ ամենայն ազգիս Հայոց, զոր Տէր Աստուած պահեացէ զսա անասանելի մինչեւ ի խորին ծերութիւնն. ամէն»¹⁶:

Այսպիսով, արդեն մեկ տարուց ի վեր Էջմիածինը տիրած Կաթողիկոսը Ստեփանոս կրօնավորի հաստատմամբ ձեռնարկում է շինարարական գործունեության. «Եւ վերստին հաստատեաց, շինեաց եւ զարդարեաց զքրիստոսահիմն եւ երկնանման շնորհաբաշխ եւ սրովբէագումար զՍուրբ Կաթողիկէ եկեղեցիս»¹⁷: Այսուհետ. «Տարածեցաւ համբաւ սորա ընդ ամենայն ծագս տիեզերաց»¹⁸:

Այն, որ Զաքարիան «զժամատեղս պայծառացոյց», նաև իր ներկայությունն իսկ ապահովություն էր ենթադրում այլազգիներից. «...եւ աներկիղ պահեաց ի մէջ այլազգեաց սեռից»¹⁹:

Ինչպէս գիտենք, Զաքարիա Կաթողիկոսը, հայ ժողովրդին գերությունից ու կոտորածից փրկելու համար, փորձում է հաշտարարի դեր դատարել Զհանշահի և ամիր Շարաֆի միջև: Ստանձնելով և հաջողությամբ իրագործելով հաշտարար-դիվանագետի պարտականությունները, Զաքարիան մեծ պատիվների է արժանանում Զհանշահի և քուրդ ամիր Շարաֆի կողմից: Աճում է նրա հեղինակությունը նաև որպէս Կաթողիկոս Ամենայն Հայոց²⁰:

Զաքարիան անվանվում է որպէս «Ողորմած տնանկաց եւ կարատելոց եւ ազնական ամենայն տարակուսելոց»²¹: Նա հոգ է տանում նաև կրթության բնագավառի բարելավման ու կրօնավորների հովանավորմանը. «Եւ խնամածու ուսումնասիրաց եւ կրօնաւորաց, զոր եւ Տէր Աստուած պահեացէ զսա ընդ ամրածածուկ աջովն իւրով»²²:

Ըստ մանրանկարի, նա առաջացած տարիք ունի և վաստակած տարիքի հետ կուտակել է իմաստություն. «Այլեւ դասեացէ Քրիստոս Աստուած զհոգի սորա ընդ սրբոց հայրապետացն Բարսղի, Գրիգորի Աստուածաբանի եւ ամենայն սրբոց հայրապետացն, վարդապետաց եւ կրանաւորացն դասակից եւ պսակակից արացէ եւ ընդ հարիւրաւորսն կացուցէ, ի գոգն Աբրահամու հանգուցէ եւ ինքնացեալ պաշտեացէ. ամէն», գրում է Ստեփանոս գրիչը՝ ավելացնելով. «Վասնզի, սա եռափափագ սիրով եւ բազմադիմի յաւժար կամաւք ցանկացող եղեալ այս հոգիաբոխ բուրաստանիս, որ կոչի Զեռնադրութիւն կաթողիկոս արհնել, մեռոն արհնել, եպիսկոպոս արհնել եւ թագաւոր արհնել»²³:

¹⁵ ՄՄ. ձեռ. № 4850, էջ 290բ: ԺԵ դարի յիշատակարաններ, մասն Բ, էջ 140:

¹⁶ ՄՄ. ձեռ. № 7627, էջ 334ա: ԺԵ դարի յիշատակարաններ, մասն Բ, էջ 143:

¹⁷ ՄՄ. ձեռ. № 4997, 135բ:

¹⁸ Նույն տեղում:

¹⁹ Նույն տեղում, էջ 135բ—ճա:

²⁰ ԺԵ դարի յիշատակարաններ, մասն Բ, էջ ԺԵ:

²¹ ՄՄ. ձեռ. № 4997, 136ա:

²² Նույն տեղում:

²³ Նույն տեղում, 136ա—բ:

Եվ, իրոք, նա արդեն հասուն հոգևորական էր, երբ 1419 թվականին ընտրվեց արքունակից Դավիթ Գ Աղթամարի Կաթողիկոսին²⁴:

Գրիչն ամենայն մանրամասնությամբ մեր առջև կանգնեցրեց մի հզոր, իմաստուն, արքայազարմ կաթողիկոսի կերպար, որն օժտված է նաև բազում առաքինություններով՝ ողորմած է, հովանավորում է կրթությունն ու եկեղեցական մշակույթը, պատվիրում է ձեռագրեր և այլն:

Իսկ ինքն իրեն № 4997 ձեռագրի գրիչը ներկայացնում է որպես տկար, տառապյալ «եւ թափուր ի բարի գործոց Ստեփանոս սուտանուն կրանաւոր ըսկսա եւ կատարեցի մեծաւ յուսով եռափափագ սիրով ի Սուրբ Էջմիածինս, առ ոոսս տէր Զաքարիայի եւ կաթողիկոսի Ամենայն Հայոց, ի խանութեան Զհանշահ փաթշահի եւ ի թուականիս ԶԺ (1461)»²⁵:

Հիշատակարանի վերջում Ստեփանոսը դիմում է ընթերցողին. «Արդ, որք հանդիպիք ամա՛ կարդալով կամ արիճակելով, յիշեցէք ի մաքրափայլ եւ յերկնաթոիչ յաղասթս ձեր», թվում է, թե գրիչը, ըստ ընդունված ավանդույթի, պետք է խնդրի հիշատակությունը իր և իր ծնողաց, եղբայրների, հարազատների և այլն, սակայն ետին պլան մղելով իր անձը՝ շեշտում է. «Զվերոյիշատակեալ պատրիարզն տէր Զաքարիա Կաթողիկոս՝ զստացող սուրբ Աստուածաշունչ տառիս, հանդերձ Ծնաղաւթն եւ ամենայն թաքազարմ նախնեաւթն եւ պայազատ իշխանաւթն: Եւ ինքն, որ առատն է ի տուրս պարգեաց, ձեզ՝ յիշողացդ եւ մեզ՝ յիշեցելոյս առհասարակ ողորմեսցի եւ տացէ երկնից արքայութիւնն. ամէն»²⁶:

Ստեփանոսի կողմից ձեռագրի տարբեր էջերում թողած հիշատակագրություններից երկուսն են միայն իրեն վերաբերվում, որոնք այդպես էլ չեն բացահայտում գրչի անձը²⁷:

Մնացյալ հիշատակագրությունները դարձյալ վերաբերվում են ստացողին, որոնցից կարելի է առանձնացնել գլխավոր հիշատակարանին նախորդողը. «Արհմեալ է Աստուած եւ շնահատոր բարով վայելել տացէ պարոն հոգևոր Տիրին մինչեւ խաղաղական կէտն վերջին»²⁸:

«Հատուկ հետաքրքրություն է ներկայացնում պարոն-տեր կոչվող հոգևոր ավատատերերի դասը», գրում է Լ. Խաչիկյանը²⁹:

Հայոց պետականության անկումից հետո, Եկեղեցին, հոգևոր գործունեությունից բացի, աստիճանաբար իր վրա էր վերցրել նաև հայ ժողովրդի ներքին գործերի տնօրինման պարտականությունը, մի հանգամանք, որ հաշվի էին առնում նաև օտար տիրակալները: Հայ Եկեղեցու պաշտոնյա-

²⁴ Ն. Ակինեան, Գառազանագիրք կաթողիկոսաց Աղթամարայ, պատմական ուսումնասիրություն, Վիեննա, 1920, էջ 82: Այս տեղեկությունը Ակինյանը վերցրել է Փիրղալեմյանի «Նօտարք»-ից, էջ 59—60, վարագ: Լ. Խաչիկյանը, Մաշտոցի մատենադարանի № 3790 ձեռագրում հանդիպելով այս հիշատակարանին, եզրակացնում է. «№ 3790 ձեռագրի մեջ եղող հիշատակարանը ամենայն հավանականությամբ ընդօրինակված է Ղ. Փիրղալեմյանի կողմից օգտագործված Ճաղընտրից» (ԺԵ դարի հիշատակարաններ, մասնատաշին (1401—1450 թթ.), կազմեց Լ. Ս. Խաչիկյան, Երևան, 1955:

²⁵ ՄՄ. ձեռ. № 4997, էջ 136բ:

²⁶ Նույն տեղում, էջ 136բ—7ա:

²⁷ Նույն տեղում, 75ա և 111բ էջերում կարդում ենք. «Զմեղապարտ գրիչս արժանի արասցես ողորմութեան քո Քրիստոս», «Եւ ես, մեռեալ անձն եւ սակաւ աշխատող Ստեփանոս գրիչ, աղաչեմ յիշել ի սուրբ յաղօթս»:

²⁸ Նույն տեղում, էջ 132բ—3ա:

²⁹ Հայ ժողովրդի պատմություն, բազմահատորյակ, հ. Դ, էջ 64:

ներն ու նրանց կալվածքները ազատված են եղել մի շարք հարկերից ու տուրքերից. «Հին ժամանակներից ի վեր մինչև օրս,—գրված է Ուզուն-Հասանի մի հրովարտականում,—երբեք այնպիսի օրենք չի եղել, որ Ուշքիլիսայի (Էջմիածնի) կրոնավորներից ու սևագլուխներից խարաջ և ջիզյա պահանջեն»³⁰: Այս պայմաններն ի նկատի ունեին հայ իշխանական տների սակավագոր ներկայացուցիչները, երբ ԺԴ—ԺԵ դարերում ենթակա վանական հաստատությունների իրավասության տակ էին դնում իրենց ընտանիքին պատկանող կալվածքները՝ վանական այդ հաստատությունների գլուխ կարգելով մերձավոր ազգականներին: Եվ այսպես, կյանքի էր կոչվում սոցիալական մի նոր տերմին՝ «պարոն-տէր», որը տրվում էր այն հայ կալվածատերերին, որոնք միաժամանակ և «պարոն» էին (այսինքն՝ աշխարհիկ իշխան), և «տէր» (այսինքն՝ հոգևոր առաջնորդ):

Պարոն-տէր էին Աղթամարի ու Գանձասարի Կաթողիկոսները, Սյունյաց մետրոպոլիտները, Վայոց ձորի առաջնորդները, Հաղբատ, Սանահին, Կեչառիս և տասնյակ ու տասնյակ այլ վանքերի վանահայրեր ու թեմերի առաջնորդներ: Նրանք ունեին զինված ջոկատներ, որոնցով, անհրաժեշտության դեպքում, պաշտպանում էին իրենց գույքն ու պատիվը օտարելկրոյա ընչաքաղց զավթիչներից:

Աղթամարի Կաթողիկոսները զինական իրենց ուժերով զսպում էին Ոստանի քրդերի ախորժակը, որոնք փափագում էին գրավել ու թալանել Աղթամարը:

Սա նշանակում է, որ, բացի հոգևոր աստիճանից, Զաքարիա Աղթամարցին ուներ նաև աշխարհիկ կոչում, ինչպես նկատեցինք նաև Ստեփանոս գրչի հետևյալ բնորոշումներից. «յազգէ թագաւորին Գագկայ Հայոց մեծաց», կամ «ամենայն թաքազարմ նախնեաւքն եւ պայազատ իշխանաւքն»³¹:

Սակայն, պետք է նկատել, որ սույն ձեռագիրը արժեքավորվում է ոչ միայն այնքանով, որ այստեղ վեր են հանվում պատմությանն անհայտ ու ծածուկ տեղեկություններ այս կամ այն անձի վերաբերյալ կամ էլ իր գեղարվեստական բարձր արժանիքներով: Այն, ինչպես կոնկրետ ստորև, հանդես է գալիս որպես կարևոր գործող անձ պատմության հոլովույթում:

Ձեռագիրն ավարտվելու շրջանում էր, երբ սկսվեցին շշուկներ տարածվել, թե Զաքարիա Աղթամարցին «խորհեցի թագաւորել ի վերայ ազգին»³², այսինքն՝ վերականգնել Հայոց պետականությունը: Գրիգոր Զալալբեկյանցն իր համախոհների հետ միասին ներկայանում է Հասան-Ալիին, որը «շրջէր թափառական զվերին կողմամբ գաւառին Արարատեան»³³: Այնուհետև Հասան-Ալին մտադրվում է «ըմբռնել զմեծ պատրիարքն զտէր Զաքարիայն եւ պահանջել ի նմանէ զգանձս եւ ինչս»³⁴:

Լինելով մեծ քաղաքագետ և կռահելով գործընթացի տրամաբանական ավարտը, Զաքարիա Աղթամարցին, իր հետ վերցնելով Գրիգոր Լուսավորչի Աջը, որն, ինչպես հայտնի է, խորհրդանիշն է Հայրապետական Աթոռի հաստատման և գոյատևման, նաև մի հնագույն խաչալամ (խաչվառ) և

³⁰ «Մատենադարանի պարսկերեն վավերագրերը», Հրովարտական, պրակ առաջին (ԺԵ—ԺԶ դդ.), Կազմեց Հ. Փափագյան, Երևան, 1958, էջ 49:

³¹ ՄՄ. ձեռ. № 4997, էջ 135ա, 137ա:

³² Միքայել Զամչեանց, Պատմութիւն Հայոց, հ. Գ, Երևան, 1984, էջ 505:

³³ ԺԵ դարի հիշատակարաններ, հ. Բ, էջ ԺԵ:

³⁴ Մաղաքիա Օրմանեան, Ազգապատում, մասն Բ, Կ. Պոլիս, 1914, էջ 2165:

այլ նվիրական իրեր ու սրբություններ, ծախված հեռանում է Մայր Աթոռից³⁵:

Ուսումնասիրությունները հաստատեցին, որ Աղթամար հասած այս նվիրական առարկաների մեջ էր նաև հիշյալ «Ձեռնադրութեան Մաշտոց»-ը:

Եթե նախորդ ուսումնասիրողներն այս իրողությունը, որն է՝ Չաքարիայի փախուստը Աղթամար, դիտել են սոսկ չարախոսությանց արդյունք³⁶, ապա Միքայել Չամչյանցն իր «Պատմութեան» մեջ նշում է. «Ծոխացեալ նորա (Չաքարիան—Հ. Հ.) իշխանութեամբ խորհիցի թագաւորել ի վերա ազգին»³⁷:

Ինչպես վերը նշեցինք, ձեռագրի վերջին բաժինը հատկացված էր Թագավորի օրհնության կանոնին³⁸: Նշանակում է Գրիգոր Չալալբեկյանցը և իր համախոհները փաստացի տվյալ ունեին Չաքարիային համապատասխան մեղադրանքներ ուղղելու: Մյուս կողմից էլ համարձակ քայլ պետք էր դիտել, թուրքմենական և քրդական գերիշխանության այս պայմաններում «թագաւորագն» կաթողիկոսի կողմից նման գործ ձեռնարկելը:

Այս ձեռագրում «Թագաւորաւրհնէք»-ը պատկերող մանրանկարում կաթողիկոսը օրհնում է Սուրբ Սեղանի առջև ծնկի իջած ապագա արքային³⁹:

Ծեսին զուգահեռ, ձեռագրի համապատասխան էջերում պատկերված են ծիսական առարկաներ: Այսպես, օրինակ, ձեռագրի լուսանցքում պատկերված է մյուռոնի սափորը, որի պարունակությամբ օծում են թագավորի գլուխը, թիկունքը «եւ զերկուս բազուկսն խաչանման»⁴⁰:

Մեկ այլ էջի վերին լուսանցքում տեսնում ենք «զսուրն վակասաւոր», որը հանձնելով արքային, ասվում է. «Ընկալ զսուրս զայս ի ձեռանէ առաքելական աստիճանի» և ապա պատվիրում. «առաջնորդեսցէ քեզ աջ քո բարձրանալ սովաւ ի վերայ անաւրիմաց եւ անհաւատից»⁴¹:

Հաջորդ էջի լուսանցքում նկարված են արքայական մատանին ու գավազանը, որոնք նույնպես համապատասխան մաղթանքներով հանձնվում են արքային⁴²:

129ա էջում՝ ոսկե թագն է՝ զարդարված բազմագույնի թանկարժեք քարերով. «Առ զթագ եւ զպսակ թագաւորութեան ի գլուխ քո»⁴³ հայտարարում է ձեռնադրող եպիսկոպոսը:

³⁵ Տես Առաքել Դարիժեցի, Գիրք պատմութեանց, աշխատասիրութեամբ Լ. Ա. Խանլարյանի, Երևան, 1990, էջ 333: «Եւ անդ (Արգիլան—Հ. Հ.) հասեալ յայտնեաց զգանձն Աստուածային, զԱջն սուրբ Լուսաւորչին մերոյ զսրբոյն Գրիգորի, հանդերձ խաչաւամովն, որ նկարեալ կայր ի մի կողմն պատկերն Տէրունական, եւ ի միւս կողմն Լուսաւորչին մերոյ սրբոյն Գրիգորի, եւ թագաւորին Տրդատայ, եւ չքնադագեղ կուսին սրբոյն Հռիփսիմեայ, այլ եւ ոսկեթել յօրինուածով. եւ ազգի ազգի գունով, երանգ երանգ զարդարեալ սուրբ ուրարովն, որ զարմանալի է տեսողացն»: Տես նաև Միքայել Չամչեանց, նշված հրատ., էջ 505: Մաղաքիա Յրմանեան, նշված աշխ., մասն Բ, էջ 2161—2166:

³⁶ Առաքել Դարիժեցի, նշված հրատ., էջ 333: Մ. Յրմանեան, էջ 2165: Հայ ժողովրդի պատմություն, բազմահատորյակ, հ. Դ, Երևան, 1972, էջ 44:

³⁷ Միքայել Չամչեանց, Հայոց Պատմութիւն, նշված հրատ., էջ 505:

³⁸ ՄՄ. № 4997, 112ա—32բ:

³⁹ Նույն տեղում, 112բ:

⁴⁰ Նույն տեղում, էջ 120բ:

⁴¹ Նույն տեղում, էջ 127ա:

⁴² Նույն տեղում, էջ 128ա:

⁴³ Նույն տեղում, էջ 129ա:

70բ, 103բ, 212բ էջերում: Հատկապես ուշագրավ է 70բ էջի նկարը, որը վերաբերում է կաթողիկոսի ձեռնադրության կանոնին:

Նկարի ստորին մասի կապտավուն երիզի վրա երկաթագիր տառերով գրված է՝ «Ձտեր Ստեփաննոս կաթողիկոս»⁴⁹:

Իսկ «Թագաւորաւրհնէք»-ին վերաբերվող հատվածում ավելացնում է. «Ըստ երևոյթին Սմբատ թագավորի օծման արարողությունն է պատկերված 212բ էջի նկարում: Սմբատը չոքել է Ստեփաննոս կաթողիկոսի առաջ թագը գլխին: Կաթողիկոսը մի խումբ հոգևորականների ընկերակցությամբ կանգնած է ձախ կողմում»⁵⁰:

Այսպիսով փոխվել են նաև պատմական անձինք: Ջաքարիայի մահվան մասին է հայտնում № 5702-ի գրիչ Ներսես եպիսկոպոսը. «Ջաքարիայն՝ քաջ նահատակն, որ ըզսպանաւ յնստան ի յանօրինաց»⁵¹:

Ներսես եպիսկոպոսի կողմից գրված գլխավոր հիշատակարանից տևելեկանում ենք, որ Ստեփաննոս Կաթողիկոսը Ջաքարիայի քրոջ որդին է: Ակինյանի համոզմամբ «Ընկերացած է Ջաքարիայի դէպի Էջմիածին, որ եւ ընդունեցաւ արքեպիսկոպոսական ձեռնադրութիւն: Ջաքարիայի եղերական մահուրնէն ետքը վերադարձաւ Աղթամար, ուր ընտրուեցաւ եւ օծուեցաւ կաթողիկոս Աղթամարայ (1465)»⁵²:

Ներսեսը, որ Ստեփաննոս Կաթողիկոսի հարազատ եղբայրն է, վկայում է, որ Ստեփաննոսը մեծարվեստ գրիչ է. «Ծինեաց զՏանական ու Սարգիս գիրքն ու զԾառն եւ այլ բազում արդիւնս արար»⁵³:

Նրա՝ որպես ձեռագրագետի ու գրչության ուսուցչի մասին են վկայում նաև Թովմա և Դավիթ գրիչները, որոնք աշակերտել են Ստեփաննոսին ու Ներսեսին:

Ահա թե ինչ է գրում Թուման 1495 թվականին գաղափարված մի Ավետարանում. «Եւ երախտաւոր վարպետն իմ եւ զհոգեւոր հայրն զտէր Ներսէս արհիեպիսկոպոսն, եւ զհարազատ եղբայրն իւր զտէր Ստեփաննոս կաթողիկոսն, որ բազում աշխատանաւք ուսուցին ինձ զարուեստ գրչութեանս եւ բազում երախտիք ունին ի վերայ իմ»⁵⁴:

Իսկ Դավիթ գրիչը չորս տարի հետո, 1498 թվականին, հիշատակագրում է. «Եւ արդ, աղաչեմ զձեզ յիշեցէք ի մաքրափայլ յաղօթս ձեր զԴավիթ անարժան գրիչս, եւ զվարպետն իմ զտէր Ներսէս հեզահոգի ընտրեալ եւ պատուական եպիսկոպոսն, եւ զեղբայրն իւր տէր Ստեփաննոս կաթողիկոսն, աղաչեմ զձեզ լի բերանով Աստուած ողորմի ասացէք սոցա. ամէն»⁵⁵:

Գրչության արվեստի վարպետ Ստեփաննոսը, որն իր փորձը հաջորդ սերունդներին է փոխանցում 1461 թվականին՝ Ջաքարիա Կաթողիկոսի հետ լինելով Էջմիածնում, գրիչն է հիշյալ № 4997 ձեռագիր Մաշտոցի:

Եվ պատահական չէ, որ արդեն Կաթողիկոս Ստեփաննոսը հատկապես իր իսկ գաղափարած ձեռագրից է ընդօրինակել տալիս Ներսես եպիսկոպոսին:

⁴⁹ ԺԵ դարի հիշատակարաններ, մասն Գ, էջ 309:

⁵⁰ Նույն տեղում:

⁵¹ ՄՄ. № 5702, 239ա:

⁵² Ներսես Ակինեան, նշված աշխատություն, էջ 109:

⁵³ ՄՄ. № 5702, էջ 239ա:

⁵⁴ ԺԵ դարի հիշատակարաններ, մասն Գ, էջ 211, 287:

⁵⁵ Նույն տեղում, էջ 270:

Ներսեսն էլ իր հերթին ամենայն երկյուղածությամբ է ընդօրինակում հիշատակարանն անգամ, միայն թե «Զաքարիայ»-ի փոխարեն գործածում է «Ստեփանոս» անունը՝ պահպանելով № 4997-ի համապատասխան տեղիի կարմրագրությունը. «Յազգէ թագաւորին Գագկայ, Հայոց Մեծաց Տէր Ստեփանոս կաթողիկոս եւ պատրիարգ»⁵⁶: Այստեղ բացակայում է «Վաղարշապատու մեծի քաղաքի»⁵⁷ բառակապակցությունը:

Սակայն «եռափափագ սիրով ի Սուրբ Էջմիածինս»⁵⁸ բառերը գրող Ստեփանոսը տարիներ հետո դեռ կվերադառնա Էջմիածինը «տիրելու»⁵⁹, ինչպես իր նախորդը՝ Զաքարիան:

Այնուամենայնիվ, Ստեփանոսը սուկ կուրորեն չի հետևում Զաքարիային, այլ հանդիսանում է իր քեռու գաղափարների իրագործողը:

Այսպիսով, 1465 թվականին, Զաքարիա Աղթամարցու մահից երկու տարի հետո, Ստեփանոս Կաթողիկոսը գահ բարձրացրեց Սմբատ արքային, որը նույնպես սերում էր Գագիկ արքայի շառավղից:

Ինչպես նշեցինք, № 5702 ձեռագիրը գրվել է 1471 թվականին, իսկ Սմբատ արքան գահ բարձրացավ դեռևս վեց տարի առաջ՝ 1465-ին, չնայած Ներսես եպիսկոպոսը օգտագործում է «եւ ի նոր թագաւորիս պարոն Սմբատ»⁶⁰ ձևը: 1463-ին էր մահացել Զաքարիան, որն իր հետ Աղթամար էր բերել նաև № 4997 ձեռագիր Մաշտոցը: Կարծում ենք, որ սույն, արդեն կաթողիկոսագիր համարվող Մաշտոց-ով էլ կատարվել է Հայոց վերջին արքա Սմբատի օծումը:

Կարող ենք եզրակացնել, որ մեզ հայտնի առաջին ձեռագիրը, գրված և ավարտված Էջմիածնում, ԺԵ դարի ձեռագրական արվեստի անգնահատելի մի մասունք է, որը մասնակից է եղել իր ժամանակի կարևորագույն իրադարձություններին, լինելով կենտրոնական գործող անձ և որպես առաջնեկ այն իր սերունդներն է ունեցել Աղթամարում: Նրանով ձեռնադրել են ոչ միայն եպիսկոպոս, կաթողիկոս և օրհնել մյուսոն, այլև օծել Հայոց վերջին արքա Սմբատին:

ՀՈՎԻԿ ՀԱՅՐԱՊԵՏՅԱՆ

⁵⁶ ՄՄ. № 5702, էջ 237բ:

⁵⁷ ՄՄ. № 4997, էջ 135ա:

⁵⁸ Նույն տեղում, էջ 136բ:

⁵⁹ Նօտարք Հայոց, հաւաքեալ եւ ի լոյս ածեալ ձեռամբ Ղեւոնդ վարդապետի Փիր-ըպէմեան Տոսբեցոյ Վարագայ վանուց վանականի, Կոստանդնուպօլիս, 1883, էջ 229. «Ի թուականիս ԶԺԶ (1467) ի հայրապետութիւն Տեառն Ստեփանոսի, որ յայս ամի գնաց լ'Էջմիածին՝ եւ տիրեաց յամենայն Հայկազեան ազգի...»:

⁶⁰ ՄՄ. № 5702, էջ 239բ: